



Na osnovu člana 15. stav 5. Zakona o Visokom sudskom i tužilačkom vijeću Bosne i Hercegovine („Službeni glasnik BiH“, br. 25/04, 93/05, 48/07, 15/08, 63/23 i 9/24), a u vezi sa Odlukom o usvajanju i provođenju plana integriteta u Visokom sudskom i tužilačkom vijeću Bosne i Hercegovine br. 08-07-2-783-1/2019 od 14.02.2019. godine, direktor Sekretarijata Visokog sudskog i tužilačkog vijeća Bosne i Hercegovine, donosi

PROCEDURE O NAČINU RADA POVJERENIKA ZA ETIKU

I

Opće odredbe

U skladu sa Planom za upravljanje rizicima integriteta koji je sastavni dio Plana integriteta Visokog sudskog i tužilačkog vijeća Bosne i Hercegovine usvojenog na sjednici Vijeća 24. maja 2023. godine. ovim procedurama je definisan način rada Povjerenika za etiku.

II

Povjerenik za etiku je nadležan za postupanje samo u slučaju nepravilnog postupanja ako su povrijeđena etička načela.

Uslovi i radni zadaci koje vrši povjerenik za etiku:

- prati primjenu Etičkog kodeksa državnih službenika BiH unutar institucije,
- promovise etičko ponašanje unutar institucije,
- pruža savjete zaposlenim o etičkim pitanjima,
- redovno educira zaposlene o etičkim pitanjima,
- prima pritužbe/prijave zaposlenih i građana za neetičko ponašanje i postupanje zaposlenih,
- procjenjuje osnovanost pritužbe/prijave neetičkog ponašanja,
- vodi registar/evidenciju o zaprimljenim pritužbama/prijavama,
- promovisanjem etičkih kodeksa smanjuje i otklanja negativne posljedice i nepravilnosti neetičkog ponašanja zaposlenih.

III

Osnov za prijavu

Povjereniku za etiku se podnose pritužbe/prijave koje se odnose na: neetičko ponašanje, narušavanje ugleda institucije Visokog sudskog i tužilačkog vijeća Bosne i Hercegovine, neadekvatno ponašanje prema radnim kolegama, svaku vrstu diskriminacije, uznemiravanja, iskorištavanja i dr.

IV

Postupak prijave

Lice ili zaposlenik koji podnosi prijavu protiv neetičkog ponašanja ostvaruje svoje pravo podnošenjem prijave pismenim ili usmenim putem Povjereniku za etiku u Visokom sudskom i tužilačkom vijeću Bosne i Hercegovine.

Pisana prijava zbog neetičkog ponašanja podnosi se na dostupnom obrascu putem pošte na adresu: Visoko sudsko i tužilačko vijeće BiH, Kraljice Jelene 88, 71 000 Sarajevo, sa obaveznom naznakom „ Za povjerenika za etiku - ne otvarati“ ili putem elektronske pošte na e-mail adresu: vstv.povjerenikzaetiku@pravosudje.ba

Povjerenik za etiku je dužan provesti postupak ispitivanja osnovanosti prijave i u slučaju zaprimanja anonimne prijave. Sve zaprimljene pritužbe/prijave se evidentiraju u registru.

V

Zaštita prijavitelja

Povjerenik za etiku kome je lice ili zaposleni prijavilo neetičko ponašanje, dužan je podatke koje sazna lično od lica koje je podnijelo prijavu, kao i druge podatke koje sazna u postupku provjere informacija, čuvati kao profesionalnu tajnu.

Licima i zaposlenim koji prijave neetičko ponašanje garantuje i obezbjeđuje se zaštita anonimnosti, zaštita od uskraćivanja ili ograničavanja prava, i zaštita od bilo kojeg oblika zlostavljanja ili uznemiravanja.

VI

Osnovanost prijave

Povjerenik za etiku je dužan provesti postupak ispitivanja osnovanosti prijave u roku od 45 dana od podnošenja prijave. Prilikom postupka ispitivanja Povjerenik samostalno utvrđuje postojanje dokaza u vezi s podnesenom prijavom. Svi zaposleni su dužni da na zahtjev povjerenika za etiku daju potrebne informacije i podatke vezane za prijavu. Pisani izvještaj povjerenika za etiku o prijavi podnosi se rukovodstvu Sekretarijata nakon izvršenog ispitivanja. Rukovodstvo Sekretarijata je dužno razmotriti izvještaj Povjerenika za etiku o prijavi i ukoliko je potrebno pokrenuti postupak odgovornosti zbog kršenja etičkog kodeksa.

Povjerenik je dužan prijavitelju dostaviti odgovor na prijavu u roku od 60 dana od dana podnošenja, osim ako je prijavu podnijela anonimna osoba.

VII

Obrazac za podnošenje prijave

Obrazac za podnošenje prijave se nalazi na internet stranici Visokog sudskog i tužilačkog vijeća Bosne i Hercegovine i njegov sadržaj utvrđuje Povjerenik za etiku.

VIII

Godišnje izvještavanje

Povjerenik za etiku dužan je rukovodstvu Sekretarijata jednom godišnje podnijeti izvještaj u pisanoj formi o svom radu i primljenim pritužbama/prijavama kršenja etičkog kodeksa u Visokom sudskom i tužilačkom vijeću Bosne i Hercegovine.

Broj: 11-02-3-2390-1/2024
Sarajevo, 14.6.2024. godine

Direktor Sekretarijata
Admir Suljagić

